

Un poco mas di nos amigo Manchito

Skirbi pa Clyde Harms

Ayera tardi, famia y amigonan a hiba Manchito Ponson pa su ultimo lugar di sosiego. Hopi hende ta corda Manchito como un participante fiel den carnaval cu su bunita disfras y carosanan tur aña y e tienda di paña cu e y su señora adora Nena a lanta hunto. Mi kier a agrega algun recuerdo di Manchito di tempo nos tabata mas hoben.

Manchito y su rumannan tabata asisti e mes school cu nos (Julianaschool) y tabata resa huntun den kerki protestant den Wilhelminastraat y asina, ademá di ta nos familia, Manchito tabata bon amigo di nos.

Manchito a lanta den Noordstraat (awor John G. Emanstraat) den un cas un poco pariba di e crusada cu Oude Schoolstraat caminda awor ta Mrs. Minute. Aya su tata Sr. Herman Ponson, un primo di mi mama, tabatin un tayer di mecanico huntun cu su omo Chalito. Ey cerca tabata e lugar di wega di "bomba". Manchito tabata un di e hungadornan regular. Ami mes tabata muchu chikito pa participa pero mi ta corda Menelio "Chas" Loefstok como e gran batido y mi ruman Nel cu tabata e mes edad di Manchito. Añanan despues Manchito a hunga diferente ramo

di deporte pa Club Caribe. Na Caribe Manchito tabata un miembro stima.

Aunke Manchito a pasa un hubentud hopi difícil, e tabata un persona cu tabata trece alegría caminda e bay. E tabata un "droogkomek" cu semper tabatin un storia of anecdota chistoso di conta. Na aña 1950 mi tabatin e placer di hunga baseball huntun cu Manchito den e ekipo PepsiCola cu Viana's tabata patrocina. Manchito nunca a briya como deportista pero e tabata un miembro di ekipo hopi aprecia.

Riba potret por mira cu Manchito tabata un hungado aprecia y stima di e ekipo di baseball PepsiCola na 1950.

Mas o menos e tempo ey Manchito a drepta mundo di comercio, cu distribucion di keeshi hulandes. Hopi aña despues Manchito a cuminsa cu bendemento di paña cu a culmina den establecimenti e tienda cu te awe ta carga su number.

Tempo nos tabata chabalo nos tabatin e costumber di duna serenata na e "galinanan" y Manchito, cu un caracter romantico, tabata e guitarrista y cantante cu semper tabata lidera nos grupito cu e cantica cu practicamente a bira nos tema musical: "Te

canto a la luz de la luna, te canto con mis quejos de amor..."

Mi ta desea Nena y henter

famia hopi forza den e diano señor. difícil aki.

Bonochi, amigo, Manchito, drumi dushi den reino di nos

clydeharms@yahoo.com

